

Pisortat akiliisarneri il. il. pillugit Inatsisartut inatsisaat nr. 10, 19. november 2020-meersoq

Kontomut akiliutinullu innersuussineq

§ 1. Inuit 18-inik imaluunniit sinnerlugit ukiullit, Qitiusumik Inuit Allattorsimaffiat pillugu inatsisip atuutilernissaa pillugu peqqussut imaluunniit Qitiusumik Inuit Allattorsimaffiat pillugu Inatsisip malillugit inuup normuanik tunineqarsimasut, Kalaallillu Nunaannit aallarsimasutut nalunaarsorneqarsimanngitsut, aningaaserivimmi kontumik innersuussissapput (NemKonto), pisortani oqartussaasut iliutsumik pisussaaffeerutsitsisumik aningaasanik akiliinermut atorsinnaasaannik. Tamanna aamma Namminersorlutik Oqartussanit, naalagaaffiup avataanut aallartitanut, kiisalu inunnut 18-it inorlugit ukiulinnut Qitiusumik Inuit Allattorsimaffiat pillugu inatsisip atuutilernissaa pillugu peqqussut imaluunniit Qitiusumik Inuit Allattorsimaffiat pillugu Inatsisip malillugit inuup normuanik tunineqarsimasunut, pisortani oqartussaasunit akiliinernik tiguisartunut atuuppoq.

Imm. 2. Inatsisitigut pisinnaatitaasut, Qitiusumik Suliffeqarfinnik Nalunaarsuiffimmi nalunaarsuisarneq pillugu Inatsisartut inatsisaat imaluunniit Qitiusumik Suliffeqarfinnik Nalunaarsuiffiit pillugit inatsip naapertorlugi CVR-normumik tunineqarsimasut, aningaaserivimmi kontumik (NemKonto) innersuussissapput, pisortani oqartussaasut iliutsumik pisussaaffeerutsitsisumik aningaasanik akiliinermut atorsinnaasaannik. Tamanna aamma inummumut nammineq sulisitsisutut imaluunniit namminersorluni inuussutissarsiummik ingerlatsisusutut qitiusumik suliffeqarfinnik nalunaarsuiffimmi normumik (CVR-normu) tunineqartumut, kiisalu suliffeqarfinnut akileraartarnermut ingerlatsivimmi inuussutissarsiummik ingerlatsisutut nalunaarsorsimasunut atuuppoq.

Imm. 3. Inatsisitigut pisinnaatitaasut, Qitiusumik Suliffeqarfinnik Nalunaarsuiffimmi nalunaarsuisarneq pillugu Inatsisartut inatsisaat imaluunniit Qitiusumik Suliffeqarfinnik Nalunaarsuiffiit pillugit inatsip naapertorlugi CVR-normumik tunineqarsimanngitsut, pisortani oqartussaasunit akiliinernik tiguisinnaanarunik:

- 1) nammineq nalunaarsuisussaaneq pillugu malittarisassat naapertorlugit Qitiusumik Suliffeqarfinnik Nalunaarsuiffimmi tiguneqarsimassapput, aamma
- 2) Imm. 2-mi malittarisassat naapertorlugit NemKontomik innersuussisimassapput.

Imm. 4. Imm. 3-mi aalajangersagaq inatsisitigut pisinnaatitaasunut, Qitiusumik Suliffeqarfinnik Nalunaarsuiffimmi nalunaarsuisarneq pillugu Inatsisartut inatsisaanni nammineq nalunaarsuinissaq pillugu piumasaqaatinik, Qitiusumik Suliffeqarfinnik Nalunaarsuiffimmi nalunaarsuisarneq pillugu Inatsisartut inatsisaannik imaluunniit inatsisinut taakkununga atatillugu aalajangersakkanik aalajangersarneqartunik naammassinninngitsunut atuutinngilaq.

Imm. 5. NemKontomut akiliineq pissanngilaq, inuk imaluunniit inatsisitigut pisinnaatitaasok kontumik akiliiffissamik allamik innersuussisimappat.

Imm. 6. Imm. 1 imaluunniit 2 naapertorlugit kontumik innersuussineq pissaaq kingusinnerpaamik pisortani oqartussaasut akiliineranut siullermut atatillugu.

Imm. 7. Naalakkersuisut malittarisassanik aalajangersaasinnaapput, Qitiusumik Inuit Allattorsimaffiannut imaluunniit Qitiusumik Suliffeqarfinnik Nalunaarsuiffimmut nalunaarsuinermit imaluunniit nalunaarsuinermit allanngortitsinermit atatillugu, NemKonto innersuussutigisaaq pillugu nalunaaruteqartoqartassasoq.

Imm. 8. Naalakkersuisut malittarisassanik aalajangersaasinnaapput, imm. 1-3-mi taaneqartunit nalunaarsuinerit allaanerusut innersuussinissamut pisussaaffeqarnermik imaqassasut. Naalakkersuisut ilanngullugu aalajangersinnaavaat, imm. 1-3-mi inuit aamma inatsisitigut pisinnaatitaasut taaneqartut saniatigut allat innersuussinissamut pisussaaffeqarnermut ilaassasut.

§ 2. § 1 naapertorlugu NemKontomik innersuussineq, aaqqissuussinermik akisussaasumut § 6 naapertorlugu Naalakkersuisut toqqagaannut pissaaq.

Imm. 2. Inuit aamma inatsisitigut pisinnaatitaasut § 1-imut ilaasut, NemKontomik innersuussereersut, qaqugukkulluunniit nutaamik NemKontomik innersuussinissamut pisussaapput. Allannguutit paasissutissiissutigineqartut piffissaaq nalunaarutiginniffik kingusinnerpaamik aningaaseriviup ammaneri ullut tallimassaata qaangiunneranit inatsisitigut kinguneqassapput.

Imm. 3. Toqusoqarnerani, inatsisitigut pisinnaatitaasut taamaatinnerini, imaluunniit inuup sulisitsisutut imaluunniit namminersorluni inuussutissarsiummik ingerlatsisutut taamaatinnerani, nalunaarsuivimmi konto § 5 naapertorlugu pilersinneqarsimasooq pillugu paasissutissaaq nunguterneqassaaq.

§ 3. Nunami allami aningaaserivimmi kontumut akiliinerit pisortanit piffissaaq eqqorlugu naammassineqarsimasutut isigineqassapput, nunami namminermit akiliinerit assingusut tiguneqarnerisa piffissap kingornatigulluunniit tiguisusumit tiguneqarsimagaluarpataluunniit, imaappat

1) nunami namminermit kontunut akiliinerit assingusut assigalugit ulloq taanna suliarineqarsimappata, aammalu

2) nunami namminermit akiliinerit assingusut tiguisussumit piffissaaq eqqorlugu tiguneqarsimappata.

§ 4. Naalakkersuisut malittarisassanik aalajangersaassapput, pisortat oqartussaasuisa iliutsimik pisussaaffeerutsitsisumik inunnut aamma inatsisitigut pisinnaatitaasunut §1-imi ilaasunut, NemKontomik innersuussisimannngitsunut akiliinissamut pisinnaatitaaffeqarnerinik, taakkununga ilaallutik pisortat oqartussaasuisa inunnut aamma inatsisitigut pisinnaatitaasut Naalakkersuisut aalajangersagaannik unioqutitsisunut akiligassanik kinguartitsisinnaalluni.

Imm. 2. Imm. 1 naapertorlugu akiliinerit kinguartinneqartut, ima tulleriillutik Nunatta Karsianut kommunillu karsianut ingerlateqqinneqassapput, akiliiffissap ukiut tallimat siornatigut ullulernerqarfianit.

Imm. 3. Naalakkersuisut malittarisassanik aalajangersaasinnaapput, NemKontomik amerlanerusunik innersuussisinnaanermut.

Nalunaarsuivik

§ 5. Naalakkersuisut nalunaarsuineq pillugu malittarisassanik aalajangersaassapput, paasissutissanik kontut § 1 aamma § 2 naapertorlugit imaqartunik.

Imm. 2. Imm. 1 naapertorlugu nalunaarsuiffimmik pilersitsinermut atatillugu Naalakkersuisut, imaluunniit Naalakkersuisunit tassunga pisinnaatitaaneqartut, aningaaserivimmi kontut inunnik aamma inatsisitigut pisinnaatitaasunik pigineqartut pillugit paasissutissanik aallernissamut pisinnaatitaapput. Paasissutissat pisortat oqartussaasuinit allanit aamma akissarsialerivinnit aaneqarsinnaapput.

Aaqqissuussinermik akisussaasoq

§ 6. Naalakkersuisut aaqqissuussinermik akisussaasumik toqqaassapput, kontut pillugit paasissutissanik allaffissornermik suliaqartussamik. Aaqqissuussinermik akisussaasutut toqqarneqarsinnaavoq pisortani oqartussaasoqarfik imaluunniit suliffeqarfik namminersortoq, imaluunniit assigisaat, Danmarkimi, Savalimmiuni imaluunniit Kalaallit Nunaanni najugaqavissoq.

Imm. 2. Naalakkersuisut malittarisassanik sukumiinerusunik aaqqissuussinermik akisussaasup suliassai pillugit aalajangersaassapput, matuma ataani aaqqissuussaananermik akisussaasup suliassai aamma naammagittaalliorsinnaaneq nakkutilliinerlu pillugit.

Piginnaatitsineq

§ 7. Naalakkersuisut pisinnaatitaapput qallunaat nunaanni aamma savalimmiuni pisortaqarfiit isumaqatigiissusiorfigisinnaallugit, aaqqissuussat il. il. pisortaqarfinnit ilaatigut sulianik isumaginninnermi atorineqartut atorsinnaanerit §§ 5-6-imi taaneqartut pillugit.

Suliffeqarfiit imminnut pigisut

§ 8. §§ 1-6-imi suliffeqarfiit imminut pigisut il. il., ingerlatsinermi missingersuutaat aningaasaliissutitut inatsimmi akuerineqarsimasut ilaapput.

Imm. 2. §§ 1-6-imi suliffeqarfiit imminut pigisut il. il., kommunip ingerlatsinissamut isumaqatigiissuteqarfigisimasai aamma ilaapput.

Imm. 3. §§ 1-6 aamma taakku naapertorlugit malittarisassat atulersinneqartut suliffeqarfinnut, peqatigiiffinnut, aningaasaateqarfinnut il. il. atuupput:

- 1) aningaasartuutit imaluunniit naatsorsuutitigut amigartoorutit pisortatigut tapiissutitigut imaluunniit ilapittuutitigut, akitsuutitigut imaluunniit inatsit naapertorlugu isertitigut allatigut matussuserneqarpata, imaluunniit
- 2) namminersorlutik oqartussanit imaluunniit suliffeqarfinnit il. il., aningaasaliissutinik, tapiissutinik, taarsigassarsianik, qularnaveeqqusiinernik imaluunniit tapiissutinik allanik tigusippat nr. 1-imut ilaasunik, tigusisumut aningaasaliissutit il. il. annertuumik pingaaruteqarpata.

Imm. 4. Imm. 1-3-li atuutissanngillat, inatsimmi allami akiliisarnermik ingerlatsineq pillugu malittarisassanik, Inatsisartut inatsisaannut imaluunniit inatsit malillugu tassunga malittarisassanik aalajangersagaasunik kattussinnaanngitsumik peqarpat.

Imm. 5. Kommuni pineqartup suliffeqarfiit imminnut pigisut §§ 1-6-imi imm. 2-mi taaneqartut ilaatinngissinnaavai.

Atuutilersitsineq

§ 9. Naalakkersuisut piffissaq Inatsisartut inatsisaanni atuutilerfissaa aalajangersassavaat. Naalakkersuisut matuma ataani aalajangersarsinnaavaat, oqartussaasunut assigiinngitsunut aalajangersakkat piffissani assigiinngitsuni atuutilissasut.

Namminersorlutik Oqartussat, ulloq 19. november 2020



Kim Kielsen